

Najib Doakan PRU13 Berjalan Dalam Suasana Harmoni
Bernama
19 April, 2013

KUALA LUMPUR, 19 April (Bernama) -- Perdana Menteri Datuk Seri Najib Tun Razak melahirkan harapan agar Pilihan Raya Umum ke-13 (PRU13) berjalan dalam suasana harmoni.

"Alhamdulillah, selesai hadiri doa selamat di Masjid Sultan Abu Bakar, Pekan. Saya mendoakan agar PRU13 berjalan dalam suasana penuh harmoni," kata Najib menerusi Twitternya.

Sementara itu, Perdana Menteri dalam satu lagi Twitter berkata kerajaan Barisan Nasional (BN) Selangor menerusi manifestonya menjanjikan rakyat negeri itu sebuah negeri yang aman, stabil dan makmur.

"Manifesto @Sayangi Selangor telah dilancarkan. Kami menjanjikan sebuah negeri yang aman, stabil dan makmur," katanya.

Manifesto BN Selangor telah dilancarkan oleh Perdana Menteri Rabu lepas.

Ia mengandungi tujuh teras dan 56 aku janji yang menumpukan kepada langkah-langkah meringankan beban kewangan warga Selangor sambil meningkatkan kualiti kehidupan mereka.

Antara lainnya BN berjanji mewujudkan koridor baharu 'Selangor Global Logistic Hub' di kawasan antara Pelabuhan Klang, Kota Raja dan Lapangan Terbang Antarabangsa KL (KLIA) di Sepang, bagi menarik pelaburan asing dengan penjanaaan 560,000 peluang pekerjaan untuk rakyat Selangor.

--BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=943628>